

Meh Sienhsoh Lwg Hauqswnh

□ Banh Vwnzcingh / 潘文清

Meh Daeg' anh dwg boux meh-mbwk lajmbanj he, bineix ndaej 92 bi lo. De miz 7 daeg lwg, seizneix lwglan baenz gyoengq, laenj gaenq miz cibgeij boux lo. Aen ranz hung ciemq baenz buenq mbiengj mbanj bae.

Daeg' anh dwg daeglwhhaj de, youq ndaw singz gunghcoz. Meh de gaen de bae ndaw singz gvaq ndwenngoenz ndaej cibgeij bi, doeklaeng mbouj rox dwg mbwq gij ndwenngoenz ndaw singz, roxnaeuz dwg ndiep lwglan lajmbanj, song bi gonq gienj baufug dauqma lajmbanj lo. Cam de vihmaz mbouj nyienh laebdaeb youq ndaw singz yiengjufuk, de cij han naeuz: "Ndaw singz laeuz sang, gik bin."

Meh Daeg' anh caen miz fuk, baenzngoenz riu mbouj dingz. De ceiq gyaез guh song gienh saeh, gienh ndeu dwg fat hungzbauh, lingh gienh saeh dwg hawj lanlan laenjaenjaen faen gij doxgaiq ndeigwn duhde.

Baeznaengz gvaq ciet, meh Daeg' anh couh baeb haujlai hungzbauh iq gyaеundei, ndawde cang 10 maenz ngaenz roxnaeuz 20 maenz ngaenz, yienzhaeuh lumj cienghginh ndwn youq gwnz daiz diemj bing nei, heuh bang lan bang laenj iq gvaqdaej lingx hungzbauh. Seizneix, lwgnyez

lingx ndaej hungzbauh haenx cungj angqvauvau hemq naeuz: "Gyo-mbaiq daxbuz (daxdaiq), daxbuz (daxdaiq) gyaеusouh beij bya." Meh Daeg' anh dingq le riu ndaej naj cungj nyaeuq caez.

Bingzseiz, meh Daeg' anh miznaj dangqmaz, lwglan baenz bang. Ndaw rug de ciengzseiz dong miz haujlai gij doxgaiq ndeigwn, miz dangz、bingj、mak、dangauh、cijvaiz、yinjliu、mba lwgraz daengj, gijmaz cungj miz. Gij doxgaiq ndeigwn neix, cungj dwg gyoengq laenj iq ceiq ngah gwn lo. Bang laenj iq mizmbangj gag daeuj ra gwn, mizmbangj dwg meh Daeg' anh heuh daeuj ndaw rug doq guhcaemz doq gwn. Ndaw rug de lumj aen youzlozyenz lwgnyez nei, meh Daeg-anh couhdwg yenzcangj youzlozyenz, baenzngoenz riu dwk bak mbouj haep bae.

7 daeglwg meh Daeg' anh bouxboux cungj hauqgingq de, cungj naeuz "ndaw ranz miz bouxlaux dwg gaiq dijbauj ndeu". Gyoengqde bang daxmeh laeb cek cunzcez ndeu, dawz gij ngaenz daxmeh yungh mbouj sat yo youq ngaenzhangz bae. Meh Daeg' anh gig daekeiq, bungz vunz couh lwnh bonjfaenh miz ngaenz lai ndaej yo youq ngaenzhangz ce.

Daeg' anh ciengzseiz daj ndaw singz dauqma yawj daxmeh de, daxmeh de gyaез gwn maz, de cungj rox ndaej cingcing cujcuј. Miz ngoenz ndeu, Daeg' anh daegdaengq daj gwnz haw cawx vanj faenjcaq ndeu ma hawj daxmeh. De gag ngeix daxmeh haengjdingh gwn ndaej angqvauvau bae. Byawz rox, daxmeh cix naeuz ngamq gwn haеux imq mbouj iek, bae heuh 3 boux laenj daeuj faen gwn vanj faenjcaq neix. Daeg' anh raen le ndawsim gamjdoengh raixcaix.

Gizsaed, meh Daeg' anh ceiq gyaез Daeg' anh lo, song bouxlaux gaen Daeg' anh bae ndaw singz gvaq ndwenngoenz mboengq haenx, Daeg-anh hix ciep bohda mehdaiq daeuj itheij gvaq, bohme hah lawz cungj hauqswnh. 4 boux vunzlaux bouxboux cungj gyaез Daeg' anh, daj ndawsim maij Daeg' anh……

Ndawsim meh Daeg' anh itciq miz aen mimiz iq ndeu, seng daegseiq le, couh maqmuengh seng saek song dah lwgmbwk, daengz laux le, couh ndaej yiengjsouh gij nemsim caeuq raeujrub "buhboemz iq".

Daeg' anh rox simgei daxmeh, de rox saw rox leix, hauqgingq vunzlaux. De nai daxmeh naeuz: "Seng lwgsai lwgmbwk cungj doxdoengz, cungj dwg

lwg, bouxboux cungj rox hauqgingq bohme h. Raeuz dwg lwgsai hix rox haеujsim ciuqgoq mwngz." Gangj ndaej daxmeh de angqyangz dangq-maz.

Daj boh Daeg' anh gvaqseiq le, ndangdaej meh Daeg' anh couh mbouj lumj gaxgonq baenzneix cangq lo. Geij beixnuengx yawj haеuј ndaw da, cix in youq ndawsim, gyoengqde gyoeb-comz youq giz ndeu, cienmonz daeuj doxyaeng, baenz faenh giluz laj neix:

Veiyi Giyau

It、Seizgan: Bi 2016 ndwen 8 ngoenz 17, singhgiz sam, ciet cungh-yenz.

Ngeih、Dieg haihoih: Gyangding ranz Daegroek caengz daihngeih.

Sam、Gij coh aen hoih: Ndawranz Lenzsiz Veiyi.

Seiq、Boux daeuj camgya:

(1) Boux ranzcawj 7 beixnuengx: Goengdaq、Daegngeih、Daegsam、Daegseiq、Daeghaj、Daegroek、Daegcaet.

(2) Boux daibyauj: Banh Cihmeiz、Banh Fanghlingz、Banh Haijyin、Banh Lingz.

Haj、Veiyi cujdaez: 7 beixnuengx doxlwnz ciuqgoq daxmeh.

(caengz sat)

Lwggwiz Baiqsouh

□ Luz Gingz / 陆琼

Seizneix, youq dangj dazyinx baihlaj, gyoengq-vunz raeuz gij ndwenngoenz cungj gvaq ndaej gig ndei lo. Ndigah, gyoengqvunz gwnz mbanj hix cungj hwng hawj bouxgeq banh laeuj hoh souh, hawj bouxgeq angqyangz caemhcai q yienh'ok lwglan hauqswnh. Mbanjnazmungz ranz singq Cinz miz boux goenglaux ndeu, de miz 3 boux lwggwiz. Gyoengq lwggwiz de cungj miz di loengcawq: Lwggwizdaih gyaеuј baenz laih, lwggwizngeih raemxda nyamq, lwggwizsam mug gwq lae.

Miz ngoenz ndeu, goenglaux ndaej 80 bi banh laeuj goenghoh. Gyoengq caencik baengzyoux cungj daeuj hawj de dem fuk dem souh. Yaek gwn ngaiz seiz, goenglaux doiq 3 boux lwggwiz naeuz: "Ngoenzneix dwg ngoenzndei, daengz seiz gwn ngaiz gwnz daiz, sou mbouj ndaej gaeu gyaеuј、uet raemxda roxnaeuz uet mug. Danghnaeuz sou guh le, couhdwg mbouj gitleih, hix dwg mbouj gingq bouxhek, sou geiq maenh bw!" 3 boux lwggwiz cungj ngaekgyaeuј han naeuz: "W! W! Rox lo! Rox lo!"

Gwn ngaiz daengz byongh lo, 3 boux lwggwiz cungj nyaenx mbouj ndaej lo, nanzsouh yaek dai:

Lwggwizsam mug lae daengz bak youh dauq sup hwnjbae, lwggwizngeih daengx naj cungj dwg raemxda, lwggwizdaih humz ndaej bi gyaеuј nyegnyeg. Vahsug gangj "Sae miz sae giuј, dauh miz dauh gvai". Sawqmwh, lwggwizdaih mwh gip bienq gvai, de doiq lwggwizngeih caeuq lwggwizsam yaepyae p lwgda, couh ndwn hwnjdaeuj, doiq ok daiz song yamq, doiq gyoengqvunz naeuz: "Gou gangj gienh saeh he hawj caezgya dingq, haxbaenh gou daeuj daengz byongh roen seiz, raen miz song duz yienz doxhoenx."

Goenglaux doq geizheih cam: "Baenzlawz doxhoenx?" Lwggwizdaih sikhaek dawz song fwngz cuengq youq gwnz gyaеuј bae, hag gij dungcoz duzyiengz doxhoenx, doq gaeu gyaеuј doq naeuz: "Baenznyaenx! Baenznyaenx!"

Song boux lwggwiz wnq raen lwggwizdaih yienghneix guh le, hix sikhaek ndwn hwnjdaeuj, doiq ok daiz song yamq. Lwggwizngeih dawz song genbuh hwnjdaeuj, baihgvas vadvad gvaq baihnaj lwgda bonjfaenh, baihsuix hix vadvad gvaq baihnaj lwgda bonjfaenh, doq uet raemxda doq gangj: "Gou



cungj mbouj saenq! Gou cungj mbouj saenq!"

Lwggwizsam hix riengz dawz genbuh vad gvaq baihnaj congghndaeng bonjfaenh, doq saengq mug okdaeuj doq gangj: "Gou aеu saux bae gyongz song duz de! Gvaq yaep he couh dawz ma hawj caezgya soengq laeuj!"

3 boux lwggwiz couh yienghneix lumj haidaiz ciengq heiq nei, nauh ndaej caezgya riuhaа, caemhcai q hix ndaej gaij gij nanzsouh bonjfaenh lo.